

«Հաստատված է »

Երևան քաղաքի ավագանու՝
«Հանրապետական կուսակցություն»

Խմբակցության նիստում

Ղեկավար՝

Ս. Մկրտչյան

02. հունիսի 2017թ.

Կ Ա Ն Ո Ն Ա Դ Ր ՈՒ Թ Յ ՈՒ Ն

Երևան քաղաքի ավագանու «Հանրապետական կուսակցություն»
խմբակցության.

Երևան 2017 թ.

1. Ընդհանուր դրույթներ

1.1 Երևան քաղաքի ավագանու «Հանրապետական կուսակցություն» խմբակցությունը,

այսուհետ՝ խմբակցություն, ստեղծվում է նորընտիր ավագանու առաջին նստաշրջանի բացման օրը՝ հետևյալ սկզբունքին համապատասխան.

ավագանու անդամների մանդատների բաշխմանը մասնակցած կուսակցության կամ կուսակցությունների դաշինքի առաջադրմամբ ընտրված ավագանու անդամներն ընդգրկվում են նույնանուն խմբակցություններում:

1.2. Խմբակցությունը առաջնորդվում է ՀՀ Սահմանադրությամբ, «Երևան քաղաքում տեղական ինքնակառավարման մասին» ՀՀ օրենքով, սույն կանոնադրությամբ, այլ օրենքներով և իրավական ակտերով :

1.3. Խմբակցության նպատակն է համախմբել խմբակցության անդամներին: Իր կողմից կատարված աշխատանքների միջոցով աջակցել ավագանու գործունեությանը՝ «Երևան քաղաքում տեղական ինքնակառավարման մասին» ՀՀ օրենսդրության դրույթներին համապատասխան:

1.4. Խմբակցության անվանումն է՝ «Հանրապետական կուսակցություն» խմբակցություն:

1.5. Խմբակցությունը կարող է դիմել ՀՀ վարչական դատարան ավագանու և քաղաքապետի ակտերի իրավաչափությունը վիճարկելու հարցով:

2. Խմբակցության գործունեությունը

2.1. Խմբակցությունը իր աշխատանքները կազմակերպում է նիստերի և խորհրդակցությունների միջոցով, բազմակարծության, փոխադարձ հարգանքի ու փոխօգնության սկզբունքներով:

2.2. Ավագանու անդամը կարող է դուրս գալ խմբակցությունից՝ այդ մասին գրավոր տեղյակ պահելով խմբակցության ղեկավարին:

2.3. Խմբակցության գործունեությունը դադարում է, եթե նրա բոլոր անդամները դուրս են գալիս խմբակցությունից, և վերականգնվում է, եթե նրա կազմում ընդգրկվում է դրա իրավասությունն ունեցող ավագանու առնվազն մեկ անդամ:

2.4. Խմբակցության կազմի փոփոխության, ինչպես նաև գործունեության դադարման և վերականգնման մասին գրավոր տեղեկացվում է քաղաքապետին կամ ավագանու նիստը վարողին, որն այդ մասին հայտարարում է ավագանու առաջիկա նիստում:

3. Խմբակցության նիստը

3.1. Խմբակցության ղեկավար մարմինը խմբակցության նիստն է:

3.2. Խմբակցության նիստում Երևան քաղաքի ավագանու «Հանրապետական կուսակցություն» խմբակցության անդամների կազմից ընտրվում են խմբակցության ղեկավար և քարտուղար:

3.3. Նիստն իրավագոր է, եթե նիստին մասնակցում են խմբակցության անդամների կեսից ավելին: Նիստում որոշումներն ընդունվում են նիստին մասնակցող խմբակցության անդամների ձայների մեծամասնությամբ:

3.4. Խմբակցության նիստերը տեղի են ունենում ավագանու հերթական նիստերի օրը, ավագանու նիստից առաջ:

3.5. Արտահերթ նիստը հրավիրում է խմբակցության ղեկավարի կամ խմբակցության անդամների կամ $1/3$ -ի նախաձեռնությամբ:

3.6. Նիստը վարում է խմբակցության ղեկավարը, իսկ նրա բացակայության դեպքում խմբակցության քարտուղարը:

4.Խմբակցության ղեկավարը

4.1. Խմբակցության ղեկավարը կազմակերպում է խմբակցության գործունեությունը, նախապատրաստում է նիստերի անցկացումը, վերահսկում է խմբակցության որոշումների և հանձնարարականների կատարումը:

4.2. Իր հայեցողությամբ խմբակցության քննարկման է ներկայացնում խմբակցության անունով ստացված դիմումները և առաջարկությունները:

4.3. Խմբակցության ղեկավարը կամ նրա կողմից լիազորված խմբակցության անդամը ներկայացնում է խմբակցությունը, Երևան քաղաքի ավագանու նիստերում, Պետական Կառավարման մարմիններում, հասարակական, հասարակական-քաղաքական և այլ կազմակերպություններում, խմբակցության գործունեության հետ կապված ցանկացած այլ փոխհարաբերություններում և զանգվածային լրատվության միջոցների հետ հարաբերություններում:

4.4. Անհրաժեշտության դեպքում խմբակցության ղեկավարը Երևան քաղաքի ավագանուն տեղեկատվություն է ներկայացնում խմբակցության գործունեության վերաբերյալ:

4.5. Խմբակցության ղեկավարը միջնորդում է ժամկետային պայմանագրով աշխատանքի ընդունել խմբակցության գործավարին և փորձագետներին՝ տալով համապատասխան հանձնարարություններ, և նրանք պարտավոր են աջակցել Երևան քաղաքի ավագանու աշխատանքներին:

4.6. Խմբակցության ղեկավարը խմբակցության անդամների հետ համատեղ քննարկում և որոշում է մշտական և ժամանակավոր հանձնաժողովների կազմավորման հարցը:

5 Խմբակցության քարտուղարը

5.1. Խմբակցության քարտուղարը, խմբակցության ղեկավարի բացակայության դեպքում կամ վերջինիս լիազորմամբ կատարում է նրա լիազորությունները:

5.2. Խմբակցության քարտուղարը կազմակերպում է Խմբակցության գործավարությունը, նիստի օրակարգը, նիստերի արձանագրությունները, անհրաժեշտ փաստաթղթերի նախապատրաստումը և դրանց պահպանումը:

5.3. Խմբակցության դիրքորոշման հիման վրա նախապատրաստում է խմբակցության և նրա ղեկավարի անունով ստացված դիմումների, բողոքների, առաջարկությունների պատասխանները:

5.4. Վարում է խմբակցության անդամների Երևան քաղաքի ավագանու նիստերին մասնակցության հաշվառումը:

6. Խմբակցության անդամը

6.1. Խմբակցության անդամը պարտավոր է մասնակցել խմբակցության նիստերին, իսկ բացակայության դեպքում՝ այդ մասին նախապես տեղյակ պահել խմբակցության ղեկավարին /քարտուղարին/ :

6.2. Խմբակցության անդամը պարտավոր է կատարել խմբակցության կանոնադրության պահանջները:

6.3. Երևան քաղաքի ավագանու նիստերից բացակայելու դեպքում պարտավոր է դրա պատճառների և իր գտնվելու վայրի մասին տեղյակ պահել խմբակցության ղեկավարին /քարտուղարին/ :

6.4. Հայտնում է իր դիրքորոշումը խմբակցության նիստում քննարկվող հարցերի վերաբերյալ :

6.5. Քվեարկությամբ մասնակցում է որոշումների ընդունմանը:

6.6. Խմբակցության անդամի անդամությունը դադարում է օրենքով սահմանված կարգով:

Երևանի ավագանու

«Հանրապետական կուսակցություն»

Խմբակցության աշխատակազմ 02.06.2017թ.